

Oleh Noor Mohamad Shakil Hameed



Cari titik noktah masalah PATI

Tindakan sesetengah majikan di negara ini yang sanggup melindungi pendatang asing tanpa izin (PATI) wajar dikenakan hukuman berat. Mengikut rekod Jabatan Imigresen sepanjang tahun lalu, sebanyak 810 majikan yang melindungi PATI ditahan dan dikenakan denda berjumlah RM1,832,000.

Menurut Ketua Pengarah Imigresen Datuk Mustafa Ibrahim, daripada jumlah yang ditahan itu, 353 majikan dijadikan, 349 lagi dikompaun manakala selebihnya dibebaskan.

Scenario ini menjelaskan betapa isu PATI tidak pernah menemui satu jalan penyelesaian yang meyakinkan walaupun operasi demi operasi dan juga tangkapan demi tangkapan dibuat oleh pihak berkuasa secara berterusan. Ironinya walaupun ramai yang ditangkap, bilangan PATI boleh dikatakan masih ramai, malah tidak keterlaluan untuk kita rumuskan bilangan mereka semakin hari semakin bertambah. Timbul persoalan kenapa perkara ini masih berlarutan dan di mana silapnya?

Dari satu sudut yang positif, kedatangan pekerja asing ke negara kita baik secara rasmi maupun secara haram menunjukkan betapa negara kita terus menjadi lubuk rezeki kepada orang luar. Limpahan nikmat dan peluang pekerjaan yang begitu banyak mendorong mereka berhijrah beramai-ramai ke negara kita untuk keluar daripada belenggu kemiskinan di negara masing-masing. Ini membuktikan pembangunan ekonomi negara kita masih rancak dan membangangkan. Namun, dari aspek lain pula situasi ini menggambarkan betapa anak tempatan, terutama golongan muda masih gagal untuk mengambil kesempatan dan merebut peluang yang terhadang di depan mata. Akibatnya kadar pengangguran tetap tinggi dan kadar pengaliran keluar wang negara juga semakin meningkat.

Apapun persoalan utama di sini ialah kedegilan sebilangan majikan melindungi PATI sehingga merugikan negara, menjelaskan keselamatan rakyat dan negara secara keseluruhannya. Antara sebab utama majikan bertindak demikian untuk mengelak menanggung kos pengurusan dan pengambilan pekerja asing terbabit.

Majikan yang tamak sanggup membelakangkan undang-undang dan mengambil risiko untuk melindungi PATI yang bekerja dengan mereka. Dengan kaedah ini, mereka bukan saja dapat berjimat

dari segi kos operasi pengurusan pekerja asing serta caruman berkaitan tetapi juga membayar gaji yang jauh lebih rendah daripada sepatutnya. Jelas tindak-tanduk seperti ini hanya bermatlamatkan keuntungan semata-mata tanpa mempedulikan kesan dan akibatnya kelak.

Kebiasaannya PATI akan dikerahkan untuk melakukan kerja yang sememangnya salah di sisi undang-undang. Misalnya untuk aktiviti penerokaan tanah secara haram, pembalakan haram, kegiatan korek pasir secara haram serta di kawasan perindustrian dan juga untuk aktiviti perludangan. Sedar atau tidak semua kegiatan ini, pertama merugikan negara dan kedua mengancam keselamatan rakyat dan negara.

Aktiviti seperti ini jelas merugikan sumber pendapatan negara, terutama aktiviti penerokaan tanah dan pembalakan haram. Khazanah negara digondol dan diteroka dengan rakusnya sehingga mengundang pelbagai malapetaka, termasuk tanah runtuhan dan banjir besar. Apakah kita tidak ingat tragedi banjir besar di Cameron Highlands akibat penerokaan tanah dan pembalakan haram.

Situasi ini menggambarkan masih terdapat majikan di negara ini yang degil, tamak dan tidak insaf. Mereka sanggup menggaji PATI untuk mencapai objektif dan kepentingan peribadi tanpa mempedulikan hak dan kepentingan orang lain. Maka, dalam konteks ini, kita berharap aktiviti penguatkuasaan dilipatgandakan supaya dapat memberkas PATI dan juga majikan yang terbabit.

Majikan terutamanya yang menjadi dalang kepada masalah ini perlu dibawa ke muka pengadilan dengan segera. Andai denda serta hukuman sedia ada belum memadai atau mampu menyedarkan golongan ini eloklah pihak berkuasa meminda undang-undang supaya dapat dikenakan hukuman lebih berat sebagai pengajaran. Penulis percaya bagi golongan majikan seperti ini duit bukanlah menjadi isu yang besar maka mereka sudah pastinya mampu membayar jumlah denda yang dikenakan dan kemudian terus melakukan kesalahan sama. Justeru, pihak berkuasa perlu memikirkan hukuman lebih ekstrem supaya benar-benar menjadi langkah pencegahan yang berkesan dalam tempoh jangka panjang.